

|            |           |         |          |
|------------|-----------|---------|----------|
| TARIKH     | 26/5/2012 | SEKSYEN | Nasional |
| MUKA SURAT | 2         | RUANGAN | NASIONAL |

# Najib diminta campur tangan

## Hubungan baik PM, Raja Arab Saudi diharap kekal kuota haji kita

Oleh Norfatimah Ahmad  
dan Nor Hidayah Che Din  
hnews@bharian.com.my

**K**UALA LUMPUR: Perdana Menteri, Datuk Seri Najib Razak diminta campur tangan bagi memastikan Kerajaan Arab Saudi mengekalkan kuota haji dari Malaysia pada tahun ini.

Langkah itu kerana Kerajaan Arab Saudi dilaporkan sedang membuat pertimbangan sama ada mengenakan sekatan atau mengantung jemaah haji dan umrah dari negara ini berikutan perhimpunan BERSIH 3.0 di Makkah dan Madinah pada 26 April lalu.

Menteri di Jabatan Perdana Menteri, Datuk Seri Jamil Khir Baharom, berkata hubungan baik antara Perdana Menteri dengan Raja Arab Saudi, Raja Abdullah Abdul Aziz Al-Saud diharap dapat menangani isu berkaitan kuota haji ini.

"Saya minta Perdana Menteri bantu kita dan campur tangan dengan hubungi Raja Abdullah dan Kerajaan Arab Saudi supaya kuota haji tahun ini dikekalkan kerana semua persiapan sudah dibuat.

"Setakat ini, penerbangan, penginapan dan sebagainya yang sudah disiapkan, biasanya awal Ramadan sudah sampai makluman kepada kita dan sekarang jemaah sudah mula ambil laporan kesihatan masing-masing.

"Jika kuota ini dalam proses tidak menentu, ia akan merencatkan persiapan yang sudah dilakukan,"

katanya kepada pemberita selepas mengadakan pertemuan dengan Duta Arab Saudi ke Malaysia, Fahad Al Rashid di Bangunan Tabung Haji di sini, semalam.

Sebelum ini, Arab Saudi menghantar nota diplomatik kepada Wisma Putra, melahirkan rasa kecewa dengan tindakan rakyat Malaysia mengadakan perhimpunan haram di Makkah dan Madinah, 26 April lalu.

Dalam nota itu, Arab Saudi meminta kerajaan memastikan dan melarang rakyat Malaysia tidak lagi menyertai atau menganjurkan apa-apa perhimpunan di negara itu.

Jamil Khir berkata, ramai jemaah menyatakan kebimbangan sama ada mereka masih berpeluang menunaikan haji tahun ini atau tidak berikutan kejadian yang mengundang perhatian serius Kerajaan Arab Saudi.

Beliau berkata, jumlah terkini jemaah yang memenuhi syarat untuk menunaikan haji dan dalam senarai menunggu adalah seramai 930,000 orang manakala kuota haji terhad kepada 28,000 orang saja.

Berikutan itu, katanya, beberapa langkah proaktif diambil termasuk dua kali mengadakan pertemuan dengan Duta Besar Arab Saudi di Malaysia, bagi membincangkan isu berbangkit antara kedua-dua negara, termasuk kuota haji.

"Fahad Al Rashid menegur tindakan penyokong BERSIH yang me-

ngadakan perhimpunan di negara-nya sambil menyifatkan ia adalah tindakan yang tidak wajar dan tidak sepatutnya berlaku.

"Duta Besar itu berkata, negara lain seperti Libya dan Mesir juga mempunyai masalah tetapi rakyatnya tidak membawa masalah itu ke negara luar, lebih-lebih lagi di tempat ibadat umat Islam," katanya.

Jamil Khir berkata, beliau juga akan menulis surat berkaitan kuota haji jemaah Malaysia kepada Menteri Haji dan Wakaf Arab Saudi yang akan disampaikan sendiri oleh Pengurus Besar Kanan Haji, TH Datuk Syed Saleh Syed Abdul Rahman minggu depan.

Sementara itu, Menteri Luar, Datuk Seri Anifah Aman menyampaikan harapan Malaysia supaya perhimpunan BERSIH 3.0 di Makkah dan Madinah bulan lalu tidak mencemarkan nama baik negara.

Beliau berkata, perkara itu dibincangkan dalam pertemuannya dengan Menteri Luar Arab Saudi, Putera Saud Al Faisal ketika menghadiri Mesyuarat Peringkat Menteri 'Friends of Yemen' pada 23 Mei lalu.

"Diharap kejadian terasing dilakukan segelintir rakyat yang tidak bertanggungjawab di Makkah dan Madinah pada 26 April lalu tidak akan mencemarkan nama baik rakyat dan Malaysia," katanya.